

'Protes burger' depan rumah Ambiga
MalaysiaKini.com
May 10, 2012
Oleh Zulaikha Zulkifli

Sekumpulan peniaga sekitar bandar Kuala Lumpur menerjah' rumah Pengerusi Gabungan Pilihan Raya Bersih dan Adil (BERSIH) Datuk Ambiga Sreenevasan di Bukit Damansara dengan membuka gerai burger.

Dikenali sebagai Pertubuhan Ikatan Usahawan Kecil dan Sederhana Malaysia (IKHLAS), kumpulan peniaga itu mahu menuntut ganti rugi yang didakwa dialami mereka sewaktu himpunan BERSIH 28 April lalu.

Presidennya Mohd Ridzuan Abdullah berkata, gerai burger tersebut juga didirikan sebagai tanda membela nasib peniaga kecil di Jalan Tunku Abdul Rahman yang kerugian akibat perhimpunan BERSIH 3.0 28 April lalu.

"Kita di sini hendak menuntut ganti rugi terhadap kerugian yang dialami oleh peniaga-peniaga semasa BERSIH 3.0.

"Kami beri masa selama dua minggu. Jika Ambiga tidak respons kita tidak akan mendirikan lebih banyak lagi gerai di sepanjang jalan ini," katanya pada sidang media hari ini.

Ikhlas adalah kumpulan peniaga yang berdemo di hadapan Kompleks Pertama di ibu negara pada 5 Mei lalu bagi menuntut Kementerian Dalam Negeri mengambil tindakan terhadap Ambiga.

Turut hadir dalam protes hari ini ialah beberapa orang wakil daripada Persatuan Peniaga dan Penjaja Lorong Tunku Abdul Rahman.

Selain itu, Ridzuan turut mendesak agar Majlis Peguam dapat memberi kenyataan berhubung siapakah individu yang bertanggungjawab untuk membayar ganti rugi dan pampasan terhadap peniaga di sekitar Kuala Lumpur.

Menurut Ridzuan lagi, beliau turut mendesak agar semua pimpinan yang terlibat dengan BERSIH didakwa di mahkamah dan tidak dibenarkan bertanding pada pilihan raya.

"Kita mahu mereka didakwa di mahkamah. Saya juga nak mereka tak boleh bertanding pada pilihan raya.

"Kalau betul sebagai pemimpin nak berjuang untuk rakyat, bela nasib peniaga ini. Kami di sini datang untuk membela. Rakyat didahulukan, pencapaian diutamakan.

"Kami juga desak agar peniaga semua jangan mengundi pemimpin yang terlibat dalam BERSIH," katanya lagi sambil menyifatkan bahawa segala kerugian yang dialami adalah berpunca daripada perhimpunan BERSIH dan kesalahan pemimpin Pakatan Rakyat.

Sementara itu, pemilik Ali's Burger, Sujadi Kartimin yang membuka gerai di depan rumah Ambiga berkata, semasa perhimpunan Duduk dan Bantah itu, beliau kerugian kira-kira RM1,000.

Katanya, beliau yang telah mula berniaga di situ sejak tahun 1986 berkata, kebiasaannya, perniagaan burger miliknya memperolehi keuntungan sehingga lebih daripada RM2,000.

"Selalu saya jual burger di pasar malam Jalan Tunku Abdul Rahman sehingga 20 beg roti. Tapi hari itu, saya rugi. Jadi, hari ini kita nak habiskan mana yang tak habis haritu," katanya.

Copyright © 1999-2012 Mkini Dotcom Sdn. Bhd
Source: <http://www.malaysiakini.com/news/197502>